

重修西園縣志

定興縣志卷二十一

文錄

諭祭李滄文

刻石墓前

順治十年歲次癸巳三月 卯朔越二十九日乙未  
皇帝遣保定府知府官胡 年

諭祭故渭源縣知縣今贈陝西按察司僉事李滄之靈曰  
試宰渭源百里寄命克勤撫字式愜輿情不意賊氛忽逞  
變起一隅乃能抗志不屈以死全節可謂烈矣爰

賜祭一壇造墳安葬 靈如在尙其承之

諭祭鹿丕宗文

咸豐 年 月

皇帝諭祭加道銜貴州都勻府知府鹿丕宗之靈曰鞠躬  
盡瘁臣子之芳蹤卹死報勤國家之盛典爾鹿丕宗賦性  
忠直國爾忘身禦敵衝鋒奮勇殉難朕用悼焉特頒祭葬  
以慰忠魂嗚呼聿昭不朽之榮庶享匪躬之報爾如有知  
尙克歆享

御碑文

朕維致身遂志人臣勤事之忱表墓旌賢當代顯忠之典  
而况孤城抗賊既從百戰以幸存一檄去官猶率全家而  
就義信貞良之傑出宜贈卹之優加爾道銜原任貴州都  
勻府知府鹿丕宗冀北蜚英黔南報最厯官七邑宣力十  
年自擢守夫都勻正籌防於邊圉扼險而渠魁生縛論功  
而翠羽榮頒方資保障之勤忽邁萑苻之起時則丹都倡  
亂龍貴連兵外至無援長圍遽合獨以孤軍撐拒屢挫凶  
鋒頗聞殘卒飢羸仍懷固志經年力竭中夜變聞雖解印  
而將行竟積薪而自焚一炬而闔門灰燼允徵報國心堅

泱旬而九邑淪亡益歎嬰城績偉爰加優卹俾建專祠屬  
因遺愛之未忘重見據情而入告稽典章而申命諡壯節  
以易名於戲從汝祖於九原忠節之家聲再振招英魂於  
萬里蠻荒之廟貌長新慰爾精誠欽茲寵命

因災異上疏

張珪

國之安危在乎論相昔唐元宗前用姚崇宋璟則治後用李林甫楊國忠天下騷動幾致亡國雖賴郭子儀諸將效忠竭力克復舊物然自是藩鎮縱橫紀綱亦不復振矣前宰相特們德爾奸狡險深陰謀叢出專政十年凡宗戚忤己者巧飾危間陰中以法忠直被誅竄者甚衆始以賊敗諂附權姦實勒們及嬖幸伊埒薩巴之徒苟全其生尋任太子太師未幾仁宗賓天乘時幸變再入中書當英廟之初與實勒們等表裏爲姦誣殺蕭楊等以快私怨天討元凶實勒們之黨旣誅坐要上功遂獲信任諸子內布宿衛

外據顯要蔽上抑下杜絕言路賣官鬻獄威福已出一令  
發口上下股栗權勢日熾中外寒心由是羣邪並進如逆  
賊特克實之徒名爲義子實其腹心忠良屏迹坐待收繫  
先帝悟其姦惡仆碑奪爵籍沒其家終以遺患構成弑逆  
其子索諾木親與逆謀所由來者漸矣今復回給所籍家  
產諸子尙在京師夤緣再入宿衛世祖時阿哈瑪特貪殘  
敗事雖死猶正其罪况如特們德爾之姦惡哉臣等議宜  
遵成憲仍籍特們德爾家產遠竄其子孫外郡以懲大姦  
君父之讐不共戴天所以明綱常別上下也特克實之黨  
結謀弑逆君相遇害天下痛心疾首所不忍聞比奉旨以

特克實之徒既伏其辜諸王暗達布哈博囉伊嚕特穆爾  
奇爾布哈烏魯斯布哈亦已流竄逆黨脅從者衆何可盡  
誅後之言事者其勿復舉臣等議古法弑逆凡在官者殺  
無赦聖朝立法強盜刼殺庶民其同情者猶且首從俱罪  
况弑逆之黨天地不容宜誅暗達布哈之徒以謝天下書  
曰惟辟作福惟辟作威害于而家凶于而國蓋生殺與奪  
天子之權非臣下所得盜用也遼王托克托位冠宗室居  
鎮遼東屬任非輕國家不幸有非常之變不能討賊而乃  
覬幸赦恩報復讐忿殺親王妃主百餘人分其羊馬畜產  
殘忍骨肉盜竊主權聞者切齒今不之罪乃復厚賜放還

仍守爵土臣恐紀綱由此不振設或效尤何法以治且遼東地廣素號重鎮若使托克托久居彼旣縱肆將無忌憚况令死者含冤感傷和氣臣等議累朝典憲聞赦殺人罪在不原宜奪削其爵土置之他所以彰天威刑以懲惡國有常憲武備卿濟蘭前大尉布哈以累朝待遇之隆俱致高列不思補報事務姦欺詐稱奉旨令鷹師強收鄭國寶妻噶哈貪其家人畜產自恃權貴莫敢如何事聞之官刑曹逮鞠服實竟原其罪輦轂之下肆行無忌遠在外郡何事不爲夫京師天下之本縱惡如此何以爲政古人有言一婦銜冤三年不雨以此論之卽非細務臣等議宜以濟

蘭布哈付刑曹鞠之中賣寶物世祖時不聞其事自成宗  
以來始有此弊分珠寸石售直數萬當時民懷忿怨臺察  
交言且所酬之鈔率皆天下生民膏血錙銖取之從以捶  
撻何其用之不吝夫以經國有用之寶易此不濟饑寒之  
物又非有司聘要和買大抵皆時貴與鄂拓克中寶之人  
妄稱呈獻冒給回賜高其直且十倍蠶蠹國財暗行分用  
如沙布鼎之徒頃以增價中寶事敗具存吏牘陛下卽位  
之初首知其弊下令禁止天下欣幸臣等比聞中書乃復  
奏給累朝未酬寶價四十餘萬錠較其元直利已數倍有  
事經年遠者三十餘萬錠復令給以市舶番貨計今天下

所徵包銀差發歲入止十一萬錠已是四年徵入之數比以經費弗足急於科徵臣等議番舶之貨宜以資國用紓民力寶價請俟國用饒給之日議之太廟神主祖宗之所安靈國家孝治天下四時大祀誠爲重典比者仁宗皇帝皇后神主盜利其金而竊之至今未獲斯乃非常之事而捕盜之官兵不聞杖責臣等議庶民失盜應捕官兵尙有三限之法監臨主守儻失官物亦有不行知覺之罪今失神主宜罪太常請揀其官屬免之國家經賦皆出於民量入爲出有司之事比者建西山寺損軍害民費以億萬計刺繡經幡馳驛江浙逼迫郡縣雜役男女動經年歲窮奢

致怨近詔雖已罷之又聞姦人乘閒奏請復欲興修流言  
喧播羣情驚駭臣等議宜守前詔示民有信其剗造刺繡  
事非歲用之常者悉罷之人有冤抑必當昭雪事有枉直  
尤宜明辨平章政事蕭拜珠中丞楊多爾濟等枉遭特們  
德爾誣陷籍其家以分賜人聞者嗟悼比奉明詔還給元  
業子孫奉祀家廟修葺完未及甯處復以其家財仍賜  
舊人止酬一直卽與再罹斷沒無異臣等議宜如前詔以  
元業還之量其直以酬後所賜者則人無冤憤矣德以出  
治刑以防姦若刑罰不立奸宄滋長雖有智者不能禁止  
比者額森特穆爾之徒遇朱太醫妻女過省門外強拽以

入姦宿館所事聞有司以扈從上都爲解竟弗就鞫輦轂之下肆惡無忌京民憤駭何以取則四方臣等議宜遵世祖成憲以姦人命有司鞠之臣等又議天下囚繫冤滯不無方今盛夏宜命省臺選官審錄結正重刑疏決輕繫疑者申聞詳讞邊鎮利病宜命行省行臺體究興除廣海鎮戍卒更病者給粥食藥力死者人給鈔二十五貫責所司及同鄉者歸骨於其家歲貢方物有常制廣州東莞縣大步海及惠州珠池始自大德元年姦民劉進程連言利分蜚戶七百餘家官給之糧三年一採僅獲小珠五兩六兩入水爲蟲魚傷死者眾遂罷珠戶爲民其後同知廣州路

事塔齊爾等又獻利於實勒們剌設提舉司監採廉訪司  
言其擾民復罷歸有司旣而內正少卿魏溫都爾昌啟中  
旨馳驛都採耗廩食疲民驛非舊制請悉罷遣歸民善良  
死於非命國法當爲昭雪特克實弑逆之變學士布哈指  
揮布延呼喇勒院使托果斯皆以無罪死未褒贈特們德  
爾專權之際御史徐元素以言事鎖項死東平及賈圖沁  
布哈之屬皆未申理臣等議宜追贈死者優敘其子孫且  
命刑部及監察御史體勘其餘有冤抑者具實以聞政出  
多門古人所戒今內外增置官屬員冗俸濫白丁驟升出  
身入流壅塞日甚軍民俱蒙其害夫爲治之要莫先於安

民安民之道莫急於除濫費汰冗員世祖設官分職俱有定制至元三十年以後改升初設日積月增雖嘗奉旨取勘減降近侍各私其署夤緣保祿姑息中止至英宗時始銳然減罷崇祥壽福院之屬十有三署徽政院斷事官江淮賦之屬六十餘署不幸遭罹大故未竟其餘比奉詔凡事悉遵世祖成憲若復循常勘調虛文延歲月必無實效卽與詔旨異矣臣等議宜敕中外軍民署置官吏有非世祖之制及至元三十年以後改升初設員冗者詔格至日悉減併除罷之近侍不得巧詞復奏不駭常調之人亦不得濫入常選累朝鄂爾多所立長秋承徽長甯寺及邊鎮

屯戍別議處之自古聖君惟誠於治政可以動天地感鬼神初未嘗徼福於僧道以厲民病國也且以至元三十年言之醺祠佛事之目止百有六大德七年再立功德使司積五百有餘今年一增其目明年卽指爲例已倍四之上矣僧徒又復營幹近侍買作佛事指以算卦欺昧奏請增修布施莽嘉原作莽齋自稱特奉傳奉所司不敢較問供給恐後况佛以清淨爲本不奔不欲而僧徒貪慕貨利自違其教一事所需金銀鈔幣不可數計歲用鈔數千萬錠數倍於至元閒矣凡所供物悉爲己有布施等鈔復出其外生民脂膏縱其所欲取以自利畜養妻子彼旣行不修潔適

足褻慢天神何以要福比年佛事愈繁累朝享國不永致  
災愈速事無應驗斷可知矣臣等議宜罷功德使司其在  
至元三十年以前及累朝忌日醮祠佛事名目止令宣政  
院主領修舉餘悉減罷近侍之屬並不得巧計擅奏妄增  
名目若有特奉傳奉從中書復奏乃行古今帝王治國理  
財之要莫先於節用蓋侈用則傷財傷財必至於害民國  
用匱而重歛生如鹽課增價之類皆足以厲民矣比年游  
惰之徒妄投宿衛部屬及宦者女紅太醫陰陽之屬不可  
勝數一人收籍一門蠲復一歲所請衣馬芻糧數十戶所  
徵入不足以給之耗國損民爲甚臣等議諸宿衛宦文之